

四庫全書

集部

欽定四庫全書

集部
唐宋元名表卷下之一

詳校官中書_臣李采

侍讀_臣孫球覆勘

總校官編修_臣王燕緒

校對官編修_臣邱庭澂

謄錄監生_臣談雋

欽定四庫全書

唐宋元名表卷下之一

明 胡松 撰

宋

謝除尚書右丞表

蘇子由

臣某言昨蒙朝命以臣某為尚書右丞者伏以渙汗之
恩已行而不反偃僂之志雖勤而莫伸上媿鴻私下慙
公議恭惟皇帝陛下接堯舜之統蹈成康之仁體貌先

王耆老之臣揀拔後來翹秀之士俛仰六載前後幾人
坦然公明故不私賢否之實穆然淵默故坐照情偽之
真臨御久則鑒愈明得失分則下無隱如臣者西南賤
士章句小儒早歲猖狂偶竊多聞之選中年流落既安
縣尹之卑遭時乏人致位近侍跌宕文墨之圃聶嚚議
論之場舉皆空言安有實效顧惟省轄之重實叅國論
之餘豈無遺賢遽及微品地寒資淺何以望三事之餘
光才短力罷安能越六聯之滯論雖復卮勉就職媿歎

何言此蓋伏遇皇帝陛下天地之仁曲成草木之陋父母之愛不錄子弟之非將建大廈以覆羣生故收衆材而無弃物然臣負過其力受非所容惟有潔已無私或不韋於托付引類自助幸得免於顛隤不渝始終少答恩造臣不勝瞻天仰聖激切屏營之至謹奉表稱謝以聞

謝翰林學士宣召表

翰林學士臣某言荷蒙聖旨宣召者成命莫回驚使華

之促召一家疎聽望雲闕以馳情實儒者之至榮豈平
生之敢望臣某誠惶誠恐頓首頓首竊以翰墨之任始
自有唐供奉至尊講聞前輩北廊奏事有如李絳之忠
中禁論兵復數卑誠之智迨我祖宗之盛最優文學之
臣時舉舊章多蒙召對頃自恭默之後稍虛顧問之常
方今聖德日躋羣臣屬目蓋將虛前席以博問繼夜燭
而疇咨宜得雋良密侍燕語如臣草野微陋章句拙疎
十載江湖之間自羣魚鳥五遷臺省之要永媿冠裳敢

謂乏人遽令至此茲蓋伏遇皇帝陛下天心廣大海德
并包物無一介之微意求萬目之舉臨朝訪道有元老
之在前燕處清心援衆正而自助從容盛德循致承平
塵露至微海嶽奚補修列聖之故事今將其時因聞見
以納忠臣亦有志臣無任瞻天仰聖感荷屏營之至謹
奉表稱謝以聞

謝除中書舍人表

越從左史擢領西垣口出命書身參法從言念山林之

迹本無富貴之心聞命若驚固辭不獲伏念臣生本西蜀家世寒儒學以父兄為師貧無公卿之助私有求于祿養輒自立於文辭慨然東遊無以上達際會仁祖訪求直言策語猖狂恃聖神之不諱考官恠怒惡悻直之非宜孰知悟俗之言特被愛君之詔感激恩遇遂忘死生莫酬國士之知適有私門之禍未填溝壑重迫饑寒時於道路望見神考一封朝奏夕聞召對之音衆口交攻終致南遷之患生雖不過嘗辱顧於二宗時不見容

勢殆瀕於九死厄窮自致黽勉何言敢云衰病之餘復
被寵光之幸此蓋伏遇太皇太后陛下母慈均覆坤德
無私欲以任姒之明躬行堯舜之道肆求多士以遺成
王者老卑會於朝廷耕築不遺於林莽遂令拔擢猥及
空疎馮唐已衰猶願雲中之往貢禹雖老未忘封事之
勤譬如木之在山生則荷恩而死無所怨水之於地行
則潤下而止不敢辭臣之事君義亦如此欲報之意非
言所殫

謝澶州簽判表

程明道

論議無補職業不修國有典刑罪在誅戮曲蒙寬貸仰
荷洪私期於糜捐莫可報謝臣性質朴魯學術空虛志
意粗修智識無取陛下講圖大政博謀羣材過聽侍臣
之言猥加風憲之任臣既遭遇明聖亦思誓竭疲駕惟
知直道以事君豈忍曲學而阿世屢進濶疎之論愧非
擊搏之才徒嘗剗瀝肺肝曾無裨補毫髮既不能繩愆
糾繆固不願沾直買名豈敢冒寵以居惟是奉身而退

自劾之章繼上闔門之請彌堅天意未回憲章尚屈更
奉發中之詔俾分提憲之權不惟沮諍論之風亦懼廢
勸賞之實力形奏述恭俟誅夷此蓋伏遇皇帝陛下極
天清明普日臨照洞正邪之心迹辨真偽於幽微察臣
忠誠恕臣狂直不忍寘諸重辟投之遠荒解其察視之
官處以便安之地生成之賜義固等於乾坤涵容之恩
重益逾於山嶽臣敢不日新素學力蹈所知秉心不回
信道愈篤願徇小夫之志不為儒者之羞或能自進於

尋常庶可仰酬於萬一

淮南轉運使謝上表

蘇子容

贊畫甘泉久玷三臺之末觀風淮甸驟陞數使之榮朝
寄匪輕地望無重愧非才選靡定厥官姑謹詔期趣行
所部寵靈所被畏惕非常竊以州郡備官所以分釐於
民務朝廷遣使所以布宣於主恩付一道之事權用六
條而舉察賦興出納俾以均輸吏治否臧責之薦黜自
匪繇更於事任詎能振肅於治綱若臣者才不足以適

時慮不足以經遠偶緣資級之例得從選用之階始自書坊出分使竹儀從褰服入佐計籌粗收歲月之勞蔑著毫分之效豈謂伏遇皇帝陛下察庶工之任使矜奉職之良勤拔於省僚授以利柄矧惟淮海之郡寔當東南之衝昔號輿區今逢樂歲五種盈疇而遂茂四民勤力以厚生料乎漕運之程無煩趣辦之急惟當敷宣惠澤通究物情編齊之利病可更立求其本刑政之重輕或失當適其中止期靖嘉少稱掄擇若乃事體貌以為

風采盡銖兩以歛民財顧在懦愚誠多闕略重念上慈
天覆聖治日新官無內外之殊事悉憂勤之繫昨臣受
任之始獲面於清光陛下臨遣之言曲加於勉諭自省
最為於踈遠何圖亦記於淵衷豈非以委任之優故特
示拊循之厚雖乾坤厚施非報謝之可言而犬馬微生
第勤勞而思奮倘驅馳之有用期終始以無渝

尚書省謝車駕臨幸表

林子中

某月日車駕臨幸尚書省臣某等惶懼惶懼頓首頓首

伏以天臺肇建具崇喉舌之司帝車下臨增重陞簾之
寄非常之舉視古無倫恭惟皇帝陛下天縱多能日新
盛德剷除衆弊裁制萬幾考先王之董治官立尚書以
為政本紀綱條理見微旨於新書勅作規模別攸司於
著位蓋慮之積年而成於茲日聞諸前世而驗於方今
忽紆清蹕之傳深聳鴻都之觀且北辰居極外環象斗
之宮而黃道所經旁及積星之位瞻威顏於咫尺被法
語之丁寧敕以在公退而交儆分曹帥屬燦然周典之

文望輦拜恩陋彼漢郎之嘆矧復宗藩遞進禁從相趨
凡獲侍於宸遊皆預窺於聖作歡聲載溢慶榮遇於一
時信史備書流美談於萬世臣某等叨膺重任久負明
恩顧懷備位之慙第劇逢辰之幸敢忘策勵期稱寵臨
臣等無任瞻天仰聖激切屏營之至謹奉表稱謝以聞

代范忠宣公遺表

李端叔

臣聞生則有涯難逃定數死之將至願畢餘忠輒留垂
盡之期仰瀆蓋高之聽

中謝

伏念臣賦性拙直稟生艱

危忠義雖得之家傳利害率同於人欲未始苟作以干
譽不敢患失以營私蓋常先天下而憂期不負聖人之
學此先臣所以教子而微臣資以事君粵自治平擢為
御史繼逢神考進列諫垣荏苒五十二年首尾四十六
任分符擁節持橐守邊晚叨宥密之求再席鈞衡之寄
遇事輒發曾不顧身因時有為止欲及物固知盈滿之
當戒弗思禍釁之陰乘萬里風濤僅脫江魚之葬四年
瘴癘幾從山鬼之遊忽遭睿聖之臨朝首圖纖介之舊

物復官易地遣使宣恩而臣目已不明無復仰瞻於舜
日身猶可免或能親奉於堯言豈事理之能諧果神明
之見嗇未獲九重之入覲卒然四體之不隨空慙田畝
之還上負乾坤之造猶且強親藥石貪戀歲時儻粗釋
於沉迷或稍紓於報效今則膏肓已逼氣息僅存泉路
非遙聖時永隔恐叩閣之靡及雖結草以何為是以假
漏偷生剗心瀝懇庶皇慈之俯鑒亮愚意之無他臣若
不言死有餘恨伏望皇帝陛下清心寡欲約已便民達

孝道於精微擴仁心於廣遠深絕朋黨之論詳察邪正
之歸搜抉幽隱以盡人材屏斥奇巧以厚風俗愛惜生
靈而無輕議邊事包容狂直而無易逐言官若宣仁之
誣謗未明致保佑之憂勤不顯本權臣務快其私忿非
泰陵實謂之當然以至未究流人之往愆悉以聖恩而
特叙尚使存歿猶污瑕疵又兼以未解疆場之嚴禁空
帑藏之積有城必守得地難耕凡此數端願留聖念無
令後患常軫淵衷臣所重者陛下上聖之資臣所愛者

宗社無疆之業苟斯言之可采則雖死而猶生淚盡詞窮形留神逝

謝吏部侍郎表

鄒志寬

代言西掖已冒至榮列職中臺更慶高選拜恩優渥撫已競慚中謝竊以六典治邦周重天官之任三銓綜吏唐推文部之權洪惟神考之正名肇復先王之成憲迄至今日益昭聖功宜得真材以貳選事而臣猥從廢斥特荷哀憐俄擢寘於近班獲預聞於機要事陛下如有

上帝敢萌一念之欺仰陛下何啻高山終乏纖埃之補
未正素餐之責遽叨越次之陞靜言思之可謂幸矣此
蓋伏遇皇帝陛下孝隆繼志道廣用中欲多士之無朋
故孤立者與進欲四方之不擾故愚守者并容爰舉斯
心俾祇厥序臣敢不激昂遭遇飭勵猷為念此餘生實
神聖之再造誓殫綿力稱寵祿之殊私

謝復官表

萬里投荒豈生還之敢望九重獨斷俄意外以蒙恩感

激哀憐縱橫涕淚伏念臣最為固陋全昧幾微有言輒
至於妄陳雖死不足以塞責上賴聖人之救物特寬司
寇之嚴刑但復竄於遐方姑使省其往咎惟昭潭之可
畏與新州而不殊形影自隨朝夕難保昏昏瘴霧信為
提耳之師兀兀愁居因得致身之道惟忠惟孝無古無
今命雖甚於垂絲心已期於結草不謂僅存之瘦骨忽
還將絕之驚魂既獲免於拘攣遂亟詣於定省名蠲罪
籍品復文階在拭拭之非常皆覲覲之莫及此蓋伏遇

皇帝陛下道彌天覆德盛春生七齡光御於丕圖萬物
率由於和氣紹隆先烈坐撫太平曲回進日之明旁燭
戴盆之下謂裕陵長育賜之第而除教官謂哲宗保全
矜其愚而屈常法召從五嶺之表端遇六龍之飛擢于
不次之中曾是惟新之數肆令甄叙俯及孤危臣敢不
因險阻艱難之備嘗念身體髮膚之再造益堅夙志遙
瞻北極之尊長與老親共祝南山之壽精誠所貫高厚
必知

通州自便謝表

陳瑩中

恩由獨斷澤被孤忠刑部之執守雖堅天子之福威無
壅乃公朝之盛事豈小己之私榮恭叙感悰仰黷高聽
中謝

伏念臣昨蒙善貸賜以生還萍跡孤睽久寄食於
異縣軍門幹蠱常委事於長男所營不足以藩身其出
每緣於餬口去庭闈者累月聞道路之一言耳受而輒
行親危而不顧緣帥司深疾其生事故傳者多指為病
狂萬口嗷嗷兩路詢詢孤突教子素存不二之風曾參

殺人寧免至三之惑事既匿而難曉時沒久而益疑制
勅深嚴就逮於重江之外獄辭平允閱實於片言之中
矜其無罪之可書許以還家而自便出園扉而涕感瞻
魏闕而神留尋沐寬恩移置近地海島萬里不如無子
之無憂淮孺一身彌覺有生之有患擢髮不足以數臣
之罪瀝血不足以寫臣之心羔羊之性至公犬馬之情
愛主忘身徇國初無係愆之私抱疾呼天惟恃精誠之
格忽因詔諭時免拘維此蓋伏遇皇帝陛下堯大并容

舜明同照人人皆使之得所事事唯恐其有偏繼志用
神考之心應天以格王之實舊弊若冰之將釋新慶如
川之方流家國平康内外交泰遂使赦令昔阻隔而今
行士有宿愆始棄置而終宥全家荷德無路酬恩螻蟻
之力至微但知恭順蒲柳之身已老尚可康捐望雖隔
於戴盆志敢忘於葵藿

台州羈管謝表

奉聖旨陳瓘自撰遵堯集語言無緒盡係詆誣不行毀

弃送台州羈管令本州當職官常切覺察不得放出州
城月具存在申尚書省臣即時望闕謝恩發離本家水
陸兼行不敢住滯今於十月初十日已到台州城內者
猷畝之志一書可通留菟之言萬里不隔集羣辭而上
達遭一覽以為榮竄路雖遙陳情已畢中謝伏念臣材
如糞土身若梗蓬非敢以著書為能所陳者戴君之義
知詆誣之不可志在尊堯豈行用之敢私心唯助舜語
言無緒議論甚迂獨歸美於先猷遂大違於國是不行

毀弃有誤咨詢虛消十載之光陰靡恤一門之溝壑果
煩揆路特建刑章若非恃庇於九重安得延齡於再造
由淮入浙自通至台怒濤雖阻於重江毒瘴殊於五
嶺尚留頂踵獨賴君親此蓋伏遇皇帝陛下天大并容
日明洞照以至慈而善貸推觀過之深仁憫此顛隳欲
其存在以身償怨螻蟻之命至微徇國捐生犬馬之心
未替夢馳丹闕目想清光重千擢髮之誅徒鬱戴盆之
望餘生易捨大德難酬

代賀皇太后生辰表

考厯占星氣應元英之候稱觴獻壽禮行長樂之宮凡
在照臨所同欣抃中賀恭以皇太后德符坤載位正母
儀淵冲自乎生知慈惠本乎天縱弼成文考既隆逮下
之風共養太姜益著思齊之美內宣陰化日嗣徽音矧
當孝治之朝尤崇聖誕之節鼓鐘具舉環珮畢臻歡聲
動於宮闈佳氣蟠於觀闕某謬通屬籍叨守近藩匪惟
宗族之同榮實與吏民而共慶

代賀明堂禮畢表

有司備物親嚴三歲之祠率土均恩實賴一人之慶照

臨所逮歡抃攸同

中賀

伏惟皇帝陛下道貫神明功參

覆載昭哉嗣服續六聖之洪休大矣孝熙備三官之至

養擢英髦而共政革苛弊以齊時庶事用康善祥斯應

物無疵癘民不怨咨天地得以清寧草木遂其零茂九

功之德既皆可歌四海之臣亦各來祭乃遵彝典爰盡

孝思時以季秋之良日用上辛之吉始告虔於原廟遂

嚴配於合宮精意感通景貺昭答大賚而兆人富肆青
而衆心新實萬世無疆之休蓋千載不逢之會臣乍辭
帷幄方守藩垣徒欣右饗之成莫預駿奔之列瞻望闕

庭

云

代倉部知池州謝表

淮壖乘障初無固圉之功江表干城復玷承流之寄甫

祇職業參布詔條

中謝

伏念臣繆膺世賞之延濫綴官

聯之末投身冗散降命竒窮曩隨牒以戍邊適傳烽而

傲備當戎馬之侵軼屢瀕至危賴王師之奮張卒獲自
保偶逃龜犢之毀復玷魚符之分矧池陽之奧區乃江
表之重地干戈載戢則必佩服苞桑之戒兵農雜居則
必洽比細柳之屯匪時閱材疇荷隆委此蓋伏遇皇帝
陛下剛健中正齊聖廣淵賜十行之書留神萬國考三
載之績久任百官自驚流落之蹤亦預使令之列臣敢
不悉循侯度祇若政經輯寧凋瘵之餘咨度弛張之道
奉上德意如瞻咫尺之光同衆戚休敢顧升斗之祿

代倉部知吉州謝表

竢罪倉曹無裨邦計分憂江國尚玷藩條丁寧臨遣之

榮怵惕拊摩之責服官甫始拊已載兢

中謝

維是廬陵

介於楚甸土膏而人瘠物夥而俗貧萬室連甍剽奪時
鳴於桴鼓千艘銜尾轉輸日困於舳艫匪時通材疇荷
隆委如臣者賦資謏薄涉世闊疎兩郡編民蔑矣慰安
之效二年省掾居然尸素之慚亟求襍被之行復與剖
符之寄力綿識眊責重事叢惟仰恃於乾坤或俯資於

塵露茲蓋伏遇皇帝陛下配天立極繼聖御圖恢舉閭
募網在綱而不紊操持大柄臂使指而必從雖遠在於
江湖猶近臨於軒陛臣敢不宣布詔令懷輯里閭急効
近功忍自謀於寵利深根固本誓勉盡於拙誠

代叔父知南安軍謝表

職方之籍甫列附庸公車之章乃容專達恩既均於錫
土誠復敢於籲天中謝惟嶺下之小邦實江西之窮處
廐傳据南北之會廩稍積前後之增民力凋殘無以追

隨他郡地望卑薄不足搖動有司既匪克勝復難自慙
職居人後憂在衆先如臣者聲迹至微技能甚短折肱
州縣雖險阻之少嘗屈首簿書顧神明之已耗晚推遷
於官牒誤畀付於守符苦為撫摩以稱臨遣此蓋伏遇
皇帝陛下敷施弘化丕冒上仁視邦選侯方旁求於召
杜考圖數貢亦罔間於鄒滕曾謂瑣微驟蒙開可此蓋
伏遇皇帝陛下監觀邦本恢養治原制賦欲均期復大
禹九州之正施仁有漸姑從文王四者之先雨露旁流

稿乾胥浹臣敬覃厚澤下逮窮民觀其拜賜之時猶有
乞憐之意既勤深恤得少竭於今年終覲大恩俾盡夷
於旁郡

代舅曹史君知筠州謝表

九畿星拱並受詔條萬乘天臨誕敷宸指雖陋邦之代
匱亦德意之親承具以聖謨告于裔土

中謝

竊以舜門

穆穆輯瑞以朝諸侯湯網恢恢受球而綴下國思皇盛
旦率履舊章肆勤前席之咨溥及左符之寄腹心屏翰

臂指豪英凡拜賜於朱幡咸觀光於丹扆如臣者至謏
而拙甚愚以疎弓箕久負於家傳簪笏偶逃於官謗長
江石壤筠水附城盼竹使以承流已過斗升之量歎楓
宸而錫對幸瞻咫尺之顏此蓋伏遇皇帝陛下濬哲文
明剛健中正下天上地酌民瘼以廣求小紀大綱收主
威而總攬邈在河山之外皆如廉陛之前臣敢不遵奉
章程慰安黎庶惇行教化漸移珥筆之風恪守部封少
効挈餅之智

代程給事乞致仕表 秦少游

臣某言臣聞耄老遽歸非臣子報君之義既衰猶仕豈
儒生處已之方惟去就適合其時乃進退不愆於禮輒
陳悃悃仰瀆高明臣誠惶誠恐頓首頓首伏念臣家本
單微材尤綿薄早緣章句聲律之末技偶中上科繼以
簿書訟獄之微勞誤更劇任三持使節八領郡麾以至
承乏小行人之官位備大司農之屬山川跋涉幾徧於
五方日月推移殆踰於四紀遂叨蘭省之秩仍忝秘殿

之名每撫心而自循縱沒齒而焉報昨以蒙恩罷守被
旨歸班身雖寄於海隅夢已升於帝所非不知懷金結
綬侍清光而足榮佩玉鳴騶聯法從之為幸但以風霜
漸迫蒲柳遽衰爰及上印之期當批乞骸之懇日暮途
遠顧已分之非安漏盡鐘鳴亦人言之可畏伏惟皇帝
陛下恢覆載之量廓照臨之明憐其實知止而請身察
其非偷安而避事避還官政獲反里閭況臣北陌東阡
雅多遊舊左殮石粥良給歲時是以誦歌真主之稀逢

咸述聖朝之難遇馬方羸老徒結戀於軒墀木已朽枯
或能蒸於芝菌臣不任祈天俟命激切屏營之至

鄂州謝上表

張天覺

宣布溫詔開諭遠民雖湖山千里之間如酺醪一堂之
上聽歡聲之相告慙共理之非良伏以旁接九江前臨
七澤地遐而陋俗魯以愚雖有沉寃莫能往愬至於極
病祇自悲吟蒙被皇明申頒德意所謂律科嚴重鈎考
碎煩方田擾安業之農園土聚徙鄉之惡私租迫脅公

帑貪求學校驅迫者或違其孝養之心保伍追呼者或
失於耕桑之候寺觀陪繕營之費東南配漕輓之舟抑
賣茶鹽強招卒伍文移速於星火追捕徧於里閭百端
紛更一切蠲罷可謂崇寧之孝治真為紹述之聖功而
臣初效外官恭承嘉命唯憂疲懦未克推行豈有設施
可圖報稱有君如此碎首以之此蓋伏遇皇帝陛下誠
實應天典常師古王路以平其好惡道樞以會其是非
察臣於元祐之間未

闕

謝改州表

臣某伏覩朝命以某地改為某州者帝天廣覆舊邦驗
民數之登侯社旁開新命首官僚之建山川頓為之改
觀人事歡謂其更生臣誠歡誠抃頓首頓首竊以喻在

偏方世稱樂土孫吳之時始創為新喻縣李唐之初嘗
析置南吳州蓋歷朝之沿革不常而百里之廣輪如昨
其民畏刑而訟簡其士樂道而俗淳中更蕩析以離居
未幾還定而安宅側聽南人之相語深惟先帝之至仁
版圖既入於職方戶口倍增於井牧若稽古典宜列中
州茲蓋伏遇皇帝陛下乾坤包涵父母愛育家四海而
無外利萬物而不遺謂四萬五千戶之區惟天與祖之
付我而三百六十官之屬曰吏以治而得民遂令外服

之賤微獲備中朝之遴選某等遭逢聖代鼓舞皇恩既
登進於吏民爰奉宣於德化服休服采願聞乃屬而一
心于蕃于宣敢祝吾君之萬壽臣無任瞻天仰聖懼抃
踴躍之至謹奉表稱謝以聞

謝上表

洪景虛

禁門直北久違龍尾之趨藩郡落南忽玷虎頭之寄即
祇官次恭布詔條中謝伏念臣蒞落而無所容愚懂而
不逮事遭逢嘉會自韋天地之恩留滯窮塗已隔江湖

之夢不謂左符之寵恒勤前席之思今所領州故為劇
鎮地方千里接甌閩百越之區縣列十城介谿谷萬山
之阻人虛憊而尚氣俗訾窳以難馴平時蒙珥筆之聲
曩歲蹈弄兵之釁皇風下暢既洗滌於三薰習氣相延
殆漸摩而一變得居長吏真可備員茲蓋伏遇皇帝陛
下德如仁宗武類藝祖及國家之閒暇先務養民知稼
穡之艱難益嚴宅牧過令臣輩亦預遣中重念臣頃侍
清光最紆殊眷雖兩言溢惡欲興投杼之疑而一意在

公獨賴垂旒之監致茲抆拭盡出生成比膺便坐之從容曲軫溫顏而慰藉感聖度不忘於微賤顧孤蹤寧慮於棄捐臣敢不鞭策疲駑奉行寬大即墨受封於萬室豈曰能賢會稽上最於三年其惟共理

饒州謝上表

禁林挾日未遑坐席之溫鄉郡一麾偶遂分符之便雖始願不敢及此豈罪人乃能得之爰奉庭闈即趨官守
中謝
伏念臣生而性介天與數奇應真主之誤知建單

車而出使茹毛北海已驚半世之遷除館西河幾絕一
生之望敢期天幸獲以身還方深故土之懷猥辱高門
之召果聞取戾旋致疾顛上印綬以歸田固為輕典佩
銀黃而夸里更沐殊恩捧檄入門過家上冢桑梓遂晨
昏之養松楸寬夢寐之思行道觀瞻合宗感涕茲伏遇
皇帝陛下合德天地玩心神明常思四表之歡不錄萬
里之過而臣空行空反曾蔑效於秋毫乍佞乍賢尚叨
榮於畫繡內而自訟其又奚言敢不上體至仁仰圖共

卷下之一
理奉三年之計自惟無補於朝廷推一日之長庶或兼容於獄市

建康謝上表

香火奉祠久卧漳濱之病絲綸借寵忽開江表之藩方俯僂以固辭辱丁寧而趨上荷恩滋甚揣分難勝

中謝

伏念臣孤起諸生親逢上聖頻年近侍空餐積懼於人言累月中樞伴食敢安於天職退從散位伏俟嚴誅當王度之清夷列公材於中外臣之無似上所誤知奉留

都管鑰之嚴况顯帥聞受連府節符之寄仍護鄉州三
組以誇一朝而獲茲蓋伏遇皇帝陛下如天至健若日
大明處法宮之中五帝其名莫及行聖人之政三王之
盛易為赫然大決於小人卓爾晉昭於君子一新美化
可謂昌辰豈伊朽鈍之餘首玷蕃宣之重臣未知為吏
何以治民安田里而無歎愁雖謹思於體國以簿書而
報期會諒不免於瘵官唯有愚忠仰酬大造

代福淮東舉茶事謝上表

後兼常平

摠浪舶於三吳訖徵善狀按雲艘於百越復冒除書揆
日問塗浹辰指部

中謝

切以漢規先具開邊羅以均輸

唐務富藏藉關征而贍本雖有便民之志頗乖實稟之
宜紛更旋奪於廷臣捐瘠或隨於軍用迨中世徙場而
權茗致諸蕃塌地以名錢大抵虛文蔑聞見效偉聖明
之立制張職守以建官吏偶失於三思事寢成於一切
維時改作盡復舊章自非通敏之流曷副班宣之責如
臣者猥蒙世賞辱在周行無材能闕閱之勞固宜反退

習功利分銖之事豈有寸長曾使華荐沾恩紀茲蓋
蓋伏遇皇帝陛下體天剛健措國清寧摠六服以收賢
明德遠矣訪萬幾而詢政使人器之遂令朝著之微亦
玷輜軒之寄臣敢不裒多益寡散滯取贏一身而二任
之加勉祇承於上意三登遺九年之食庶還定於王民
國史院進三朝正史帝紀表

三后在天誕著丕謨之懿百年積德惟憑信史之傳方
論次之開先仰威靈之如在載涓昧旦輒冒宸嚴臣等

惶懼惶懼頓首頓首竊以詔厥孫謀實為大訓必有不
刊之典用扶可久之基赫赫裕陵制作擅百王之冠魏
魏哲廟規模宏七世之觀迨昭考之勃興備盛朝之盡
美治安之極剖判所無禹繼舜舜繼堯顧三聖而守一
道事繁時時繁月宜有經以垂無窮慨多歷於歲華訖
未施於功緒蓋士起異同之論而時更板蕩之餘視熙
豐符祐之成舉是非而雜揉攷崇觀政宣之志頗放失
於舊聞賴故家遺俗之猶存致偉蹟宏休之可紀參稽

定貫允屬昌辰恭惟皇帝陛下宗祏宅心羹牆係念明
列祖之成德以庶邦惟正之供覲文王之耿光善孝子
述人之事欲壯西廂之御趣哀東觀之書臣等自媿庸
虛敢知筆削書大事而垂則簡牘已殫緗素之勤藏名
山而副在京師終冀汗青之望臣無任瞻天仰聖惶懼
屏營之至謹以三朝正史帝紀隨表上進以聞

謝除禮部尚書表

王謙中

臣某言昨蒙聖恩召臣歸朝除為禮部尚書者外間覽

分遽過歸於驛召昕朝甫對即擢長於春官席寵逾涯
撫躬憎懼臣誠惶誠恐頓首頓首伏念臣某奮身孤遠
逢世休明仕不因人終始皆蒙於睿簡才非適用險夷
但竭於愚忠去國倚廬起家臨鎮豹尾隔四年之從麟
符專一道之權聞田里之歎愁具知疾苦頒條詔之寬
大方究撫綏敢圖宣室之具恩誤玷中堂之率屬跡陪
駕驚恍疑夢寐之回履上星辰頓覺依乘之近被服章
之安吉引車轡之閑馳榮渥併加微軀難稱茲蓋伏遇皇

帝陛下亶聰建極知哲能官聚英雋以尊朝蓋為本根
之慮咨直清而典禮不徒玉帛之云退省迂儒曷庸妙
選臣敢不益堅素節仰報隆知顧北斗喉舌之司當謹
出納如稽古禮文之事敢廢討論臣無任瞻天荷聖感
佩屏營之至謹奉表稱謝以聞

謝除吏部尚書兼翰林承旨表

周必大

頻年入侍徧塵清近之班兩職並陞復冒殊尤之寵貫
服章於朽質被鞵策於名駒異渥鼎來危衷震惕臣誠

惶誠懼頓首頓首伏聞漢以尚書為喉舌唐以翰苑為
腹心明光畫省之嚴夔龍接武玉殿金鸞之邃頗牧在
中凡遇遷掄已為要劇矧疊膺於組綬足增耀於簪紳
如臣者天分弗高人才甚下自惟始願不踰州縣之間
誰意晚塗浸躡賢豪之上揆分數祈於罷免疏榮更誤
於褒遷冠秩序於南宮進班聯於東閣胡瞻鶉特久慙
受祿之無功兼得熊魚彌媿含生而取義二儀施大一
介命輕此蓋伏遇皇帝陛下文武生知聖神廣運使人

也器隨良窳以無遺與物為春舉根莠而畢遂是容賤
士仍玷高門惟聖朝法令之具存初不勞於裁覽而明
主德功之俱懋亦何待於論思第當守三尺以不欺且
復盡一心而無隱庶持孤節仰報鴻私臣無任瞻天仰
聖感激屏營之至謹奉表稱謝以聞

謝除禮部尚書兼翰林學士表

宗伯綴文昌之坐已高曳履之班翰林依華蓋之星尚
玷絲綸之直當聖主謹持於公器獨愚臣常媿於私人

中謝瞻城南尺五之天致身無路想玉堦方寸之地通籍幾年況乎出入禁嚴周旋侍從論思獻納日邇清光衣被服成歲叨徽數向匪負一時之望安能符衆論之公如臣者學不足以知方才不足以應務家壁四立甘為窮陋之民君門九重敢起躋攀之念忽拜便蕃之命疊加優異之恩帥屬春官光貳卿之舊次搞文禁苑忝四命之新榮煥寶帶以章身飾繡韉而騫駿正使實蕪數器尚虞稱塞之難矧伊初乏寸長何意超踰之甚周

章就列俯仰懷慙此蓋伏過皇帝陛下道叶舜華志恢
禹迹明明在下雖洞照於羣情浩浩其天每包涵於萬
類寧稍捐於爵秩恐或弃於菲葑遂致凡才亦塵顯仕
臣敢不悉其思慮稱是寵褒號令文章期助漢家之制
討論潤色勉希鄭國之賢苟違素飭豈酬洪造臣無任
媿感之至謹奉表稱謝以聞

中書舍人謝除翰林學士表

鳳掖演綸久埃黜幽之典鑒坡裁詔誤叨倖直之榮拜

命周章捫心媿汗臣誠惶誠恐頓首頓首伏以禹謨舜
典周誥商盤德意具孚雖本帝王之惻怛訓詞播告亦
須臣下之討論惟坦然明白於一心故策若傳流于萬
世矧惟聖代丕振文明承明著作之庭畢來俊彥金馬
玉堂之士尤慎選掄宜得名儒專承內命如臣者斷無
他技累有至愚粗知前事之可師每嘆小才之難強螢
憲夜學燭莫望於金蓮蓬戶久居班豈知於玉筍奮身
一第餬口四方叨逢盛世之旁求獲與羣賢而並騫驟

離粵渫服在高華潤色非長悵已窮於薄技論思莫效
居有負於厚恩切幸保全敢希進擢豈謂忽從西戶躡
寘北門以荒蕪之學而備顧問於禁林以骯骯之文而
助發揮於睿藻寵雖至矣懼亦隨之此蓋伏遇皇帝陛下
下聖以日躋智由天錫垂拱視民之阜始終典學之脩
孔子多能集大成而自得高皇善任屈羣策以無遺遂
致採薪俯令視草臣敢不告謀猷于后以聖王為師聽
漢詔於山東少補中興之治布堯言於天下庶無內相

之慙臣無任

云

謝除太府少卿表

具官臣某言某月日奉聖旨除臣為太府少卿者將命
江淮久塵星省疏榮魏闕驟亞月卿念委寄之不移知
皇恩之愈厚臣誠惶誠恐頓首頓首伏念寒鄉晚出薄
宦卑飛叨逢籲俊之秋溫綴登畿之數粵負乘於外府
旋列屬於中臺所懼汰歸乃膺臨遣給餉坐兼於兩路
空餐行及於再暮自量心計之非長常恐使華之不稱

竊稽往籍具有前模流馬木牛葛亮創蜀中之運輦車
驪駕寇恂資河內之軍彼皆值於行師尚不聞於乏事
矧脫劍索弓之後無飛芻輓粟之勤第鈎考於簿書粗
幹旋於金穀論功何有竊位則多已慚假寵於諸郎更
許參華於七寺中負梁鷁之刺徒驚晉馬之蕃此蓋伏
遇皇帝陛下大智博臨深仁徧覆灼知能否故雖遠而
不遺力勸事功凡有長而必錄爰茂出綸之渥悉褒總
賦之臣遂致下愚亦升少列臣敢不仰承睿眷俯竭駕

才無廢前勞少助足食足兵之政更圖後效永堅惟忠
惟孝之心臣無任仰天荷聖感激屏營之至謹奉表稱
謝以聞

謝吏部侍郎表

嚴近叨居夙負瘵官之責武文迭試更膺換部之榮襲
衣頒在笥之珍寶帶錫章身之寵仰慙主眷俯愧輿言
中謝臣聞古之銓綜存乎人今之銓綜一於法存乎人
固可以得士然其敝也嘗由予奪之不公一於法固可

以滅私然其敝也或致賢愚之同滯而況簿書紛若胥
吏雜然苟稽察之弗精將混淆而莫辨欲酌古今之中
制當令人法之並行庶稍戢於吏姦亦少伸於士氣豈
容虛受以累明揚伏念臣性鄙習迂志卑才下早親翰
墨第為書生陳腐之談久侍軒墀初乏禁從論思之語
引去則殊私之未報欲留則高位之難安方進退之靡
寧忽選除之下逮肺腑抱履冰之懼面顏形捷市之羞
被此光靈若為稱塞茲蓋伏遇皇帝陛下乾行不息日

照無私知人非堯帝之難巧士奚患選衆有臯陶之舉
枉直自分夫何一介之臣乃冠貳卿之列臣敢不遵承
法令振拔滯淹雖微氷鑑之明上裨睿哲誓守權衡之
信仰助公平苟不辱知斯為報國

謝除禮部侍郎表

掌秘府之圖書久玷英遊之列奉甘泉之筆橐駝汙法
從之班恩厚踰涯感深洽骨中謝臣聞知人繇乎堯哲
分職著於周官明三德以有家所以撫五辰而凝庶績

佐六卿而率屬所以倡九牧而阜兆民何畏巧言其惟
吉士如臣者以一介甚踈之跡荷兩朝特達之知槐市
蓬山早塵華選烏臺鸞掖浸陟要班洎中返於江湖亦
旋歸於魏闕踰年于此片善莫聞心踧踖以不安顏忸
怩而罔措所期顯黜乃誤殊遷惟宗伯古之清曹惟貳
卿今之撫仕禮樂自天子出雖上稟於聖謨籙豆則有
司存當俯求於故實夫何鄙朴而許攝承夙夜直哉惟
清莫遂夔龍之選文章煥馬可述更慙乘馬之工茲蓋

伏遇皇帝陛下冠古聰明御圖勤儉辨臣鄰之邪正昭
示抑揚閔風俗之墮偷力加勸沮知臣雖無可用之實
察臣粗有不欺之愚特假寵榮俾陪亞旅臣敢不益堅
素守更厲丹心效守職之小忠詎塞論思之責竭事君
之大節或酬覆幬之仁

太上皇帝上僊慰皇帝表

天心難測邦禍荐臻甫涉夏秋而喪考妣

中慰

臣竊以

慈懿寢園之奉翼馭將歸聖安丹鼎之成龍胡以斷黎

庶攀號而不釋聖神悲痛以何堪恭惟陛下孝通神明
躬侍寢膳大舜終身之慕每竭誠心有唐二聖之歡方
隆榮養驟罹變故諒極哀惻願寬銜恤之情毋與宅憂
之禮臣退休田里阻詣宮庭臣無任

云云

孝宗登遐慰皇帝表

聖君侍膳方伸永命之新天父登遐忽下過音之詔痛
結嚴宸之邃哀纏率土之濱中慰恭以尊號德洽民心
仁根天性陟帝位二十八載高蹈勸勤至寢門一日三

朝夕膺隆養福共期於壽考疾俄殆於寤興設黼宸於
牖間惟聞末命乘白雲於帝所恍隔真遊撫弓劍以空
存視羹牆而猶見恭惟陛下睿思罔極孝慕素深問安
節以色憂不能正履宅亮陰而思道茲故弗言願懷繼
志之圖少抑終身之戚臣忝絀郡綬邈在海隅驚奉諱
音徒結攀號之戀坐縻官爵莫伸奔問之誠

皇太后升遐慰皇帝表

慈帷晝掩哀訃夕聞凡思持載之功舉抱催傷之痛

中

慰恭惟陛下事親盡禮侍膳殫誠久承文母之歡徽音
遽隔遠邁顯宗之孝追慕何窮願寬陟謁之悲少副普
天之望

皇太后升遐慰皇帝表

釁結東朝悲纏中夏遙知晬穆正劇哀恫

中慰

共惟陛

下性本自天行皆高世漢文至孝晨昏無解帶之安虞
舜好生遠邇有畫冠之禁既勤施德可謂寧親脩聞厚
地之傾莫晚彼蒼之意須思適變毋致過哀上以符慈

寧治命之言下以副黎庶誠心之懇

皇后上僊慰皇帝表

桂輪隱耀椒掖獻儀厚載既傾淵衷斯惻

中慰

伏以大

行皇后天姿恭儉地望高華久殫婦順之勞正倚坤寧
之助奄從先后莫返中闈恭惟陛下孝切亮陰思隆儺
極雖聖情之易感故天數之難移願寬當宁之思垂副
含生之望臣退居田里阻造宮庭臣無任

云

孝宗梓宮啟攢慰皇帝表

舜三年之喪修臨襄葬商兩楹之殯初啟散塗痛結重

宸悲纏率土

中慰

恭惟太上皇帝陛下孝思罔極宸禮

無違雖恭默弗言若已忘於天下然齊疏躬服自不廢
於宮中願紆追慕之懷益盡送終之典臣效官疎遠奉
報驚摧莫伸同軌之駿奔徒隕交頤之涕泗

顯仁太后發引慰皇帝表

陟彼岵兮爰卜青烏之吉維其時矣遽瞻畫雲之行祖
道逶迤聖情惻楚

中慰

恭惟陛下德鍾天性道冠人倫

粵符素奈之謠深切蓼莪之感親喪故所自盡也內不廢於三年聖德何加於孝乎外已刑於四海逮茲遣奠尤極哀悰顧淑靈已隔於東朝惟追慕少寬於南面

寧宗發引慰皇帝表

龜筮協從既先於遠日龍輜就祖已次於近郊罄海宇以悲摧極乾坤之悽愴中慰恭惟陛下作民明辟執古通喪致堯之思於羹牆而如見盡舜之孝豈富貴之解憂屆七月之有期增九重之永慕臣輸將無補扈從有

行臨表涕零實難忘於忠戀承祧體重願少抑於聖懷
太皇太后掩殯慰皇帝表

駝馭上賓武帳久虛於長樂龜猶未諗容衣遂闕於稽
山一人嗟慈範之違萬國嘆坤儀之遠中慰恭惟陛下

純誠冠古至行積中慕親之心未嘗息焉執喪之禮可
謂盡矣神靈為之顯相天日至於晏溫用葛無麻蓋異
魯君之母因山配地實同唐室之規仙寢既成真游莫
返追懷聖善固益動於孝心俯為邦家當勉裁於哀慕

欽定四庫全書

唐宋元名表
卷下之一

三十八

同前

日月有期爰畢因山之制寢園在望共勤陟謁之瞻追懷太妣之徽音益惻武王之達孝恭惟陛下德隆天性念極母儀既哀戚之內深亦禮文之外盡為之宅兆奉長樂之禕衣見于著龜配裕陵之吉壤逮茲甫窆孰不纏悲雖上聖旣旣痛長違於慈矩然下民悃悃願勉抑於至情

寧宗掩殯慰皇帝表

禹穴因山今圖改卜漢陵復土大事既襄凡戴照臨舉

深摧咽

中慰

恭以謚號皇帝休功邁世至仁如天方垂

衣以致太平迺脫躡而超萬乘六飛八駿尚仙馭之來

歸萬歲千秋竟神遊之永閼恭惟陛下義隆送往孝極

奉先慨日月之有期倏寢園之告備臣將指扈送引睇

闕庭鍾慶發祥已兆龍岡之吉節哀順變願寬駟隙之

悲

太上皇帝掩殯慰皇后牋

虞帝陟方守已迷於梧野太公卜葬役始就於櫟陽復
土言遄望雲靡及中慰切以尊號儲精物表玩化天倪
太山其頽驗孔聖兩楹之真祈招不作信穆王八駿之
遊茲永閔於慈顏宜有傷於沖挹恭惟陛下順承靡倦
定省弗違婦子熙熙尚憶椒盤之奉山川鬱鬱空聞廩
主之歸永懷如在之靈豈曰無從之涕伏望茂加節抑
勿過憂傷惟孝道之大端初不專於哭踊況王心之鉅
創尤所賴於慰寬

太皇太后掩殯慰皇帝表

兵衛載處風靜胥江之浪輜車已窆雲深禹會之山甫
周復土之儀益重居廬之感中慰伏以謚號蚤推食淡
晚樂含飴厭代賓仙棄四海九州之養因山定制安千
秋萬歲之靈仙馭莫追淵衷永惻共惟陛下仁心內恕
德教旁加稱孝孫稱哀孫不忘繼志讀喪禮讀祭禮尤
謹送終既永傷而永懷且如疑而如慕伏願為宗祊而
自重順時變以安行謂葬曰藏既克襄於大事至禮而

止更節抑於餘哀

太皇太后祔廟慰皇帝表

歷主來歸既講九虞之祭椒塗永闕遂叅諸后之游悲

動紫宸禮嚴清廟

中慰

恭惟陛下誠通幽顯道述祖宗

問寢承顏事母昔同於事地謹終追遠寧親今至於寧
神雖云彛訓之遵時乃明王之孝閔宮有恤已聞升祔
於姜嫄南面何為願節哀悃於虞舜

慈烈皇后祔廟慰壽成太后牋

事嚴葬聖甫畢於山陵禮重祔姑益尊於宗廟聿隆安

奉深示顯承

中慰

切以尊號位歷四朝謀詒萬世寶慈

建極尚垂坤厚之光精爽在天宜正渙亨之假恭惟殿下巍巍冲德翼翼孝誠如慕如疑獨厚送終之意以享以祀式嚴升配之儀諒因制寢之成益重視奮之感願稽國典少釋聖懷雨露既濡雖未忘於悽愴春秋而祭尚少慰於哀思

寧宗祔廟慰皇帝表

廠衛反虞九筵載秩宗祊升祔萬世不祧

中慰

共以謚

號靈德在天睿謨垂世鼎湖弓劍已迄大事之裏高廟
衣冠再侈崇儀之奉昭穆以序安侑惟時恭惟陛下若
稽大猷荅揚先訓主鬯以承祭祀於昭震濬之符假廟
以致精神深明萃聚之義既右烈考載陟新宮寧親大
於寧神既率先於孝治盡倫從而盡制願俯就於禮經
少抑哀思以祚羣品

同前慰皇帝表

龍湖莫返一以逮於僊游駒隙易馳十遂周於旬晷感
時增疚率土同情中慰恭惟陛下嗣服無疆繼聖有作
本生知於愛敬爰躬履於艱難率天下以為堯喪舉行
三年之制慕終身而見舜孝度越五帝之隆驚晦朔之
屢更軫哀恫之一念願副有生之望少寬固極之悲

慰皇帝表

僊游莫返倏驚流景之遷禮典有常奄及終喪之制感
時增慕易月從權中慰恭惟陛下授神器之公承宗祧

之重雖嬛嬛在疚難忘人子之至情然業業萬幾當為天下之大計願少寬於宸慮以永御於丕圖

元正慰表

行夏時而正厯荐易歲華履春露以念親益昭聖德凡預載持之數共懷怵惕之思中慰恭惟陛下以大孝而顯揚任姒之徽音以至尊而度越參騫之高行當萬國貢珍之在列嘆東朝靈几之方新佩響唐宮莫展壽觴之禮鐘鳴漢殿暫停元會之儀願寬追遠之心茂對履

端之序臣猥將隆指不獲躬詣東上閣門臣無任

云

冬至慰表

化國日舒徐行北陸聖人孝至永念東朝凡在輿情同

深孺慕

中慰

恭惟陛下德隆天性報厚母慈當宮線之

初添帳褱衣之漫遠率百官而為壽忍虛興慶之彛儀
幸舊宅而會冬益愴永平之故事願抑對時之感俯安
率土之心

冬至慰表

望雲氣於觀臺甫驗新陽之至斷鐘聲於長樂莫陳亞
歲之儀上切哀恫下均感慕中慰恭惟陛下行高文帝
孝邁有虞誦凱風聖善之詩悵六駝之永隔當化日舒
長之候視一線以增悲仰祈宸抱之少寬式副天心之
來復

同前

亞歲甫臨方講漢儀之舊徽音寢遠共深文母之思遙
知晬穆之光正切哀恫之慕中慰恭惟陛下道同堯舜

行過淵騫罷長樂之壽觴深悲節物望慈寧之總帳益
動孝思願寬追遠之懷庶對履長之序

一代文潞公謝太皇太后表

張文潛

稽留君命政求免於刑誅惠養老臣不使勞其筋力仰
睿私之從欲撫衰志以知榮伏惟太皇太后陛下厚德
無疆至仁在上神孫臨祭知保乂之聖功多士充庭見
肅雍之盛德恩及草木喜同天人臣幸以餘齡獲逢盛
旦雖籩豆駿奔之事徒有心哉而禮樂大備之時為後

死者豈不偶爾尚足矜榮

謝除權吏部尚書表

充員瑣闥自顧固功擢長銓曹忽蒙誤寵仰皇慈之至
渥揣微分以何堪

中謝

竊以選部持衡夙號六卿之長

文昌聽履實為八座之聯非素推公方不足以杞吏奸
非妙有德望不足以厭輿論雖黃繖之下無參異同而
縉紳之流鮮不關係宜求精敏之彥以當要劇之司伏
念臣才不逮人學徒泥古一為支郡三八脩門久侍上

皇愧愚衷之無補親逢嗣聖荷褒擢之有加代言非陸
贄之工批敕謝李藩之器俯徇芻蕘之論屢寬斧鉞之
誅去省中者五年遂躡登於冢宰離班行者一載遽首
列於從臣禁林兼內制之文史館涉信書之筆滿盈已
甚控避莫回頒御府之襲衣益之鞶帶駕天閑之良馬
覆以雕鞍但喜悅親之私敢云稽古之效茲蓋伏遇皇
帝陛下多能天縱盛德日新蒐舉異才踵登持橐之選
優容棄物獨負改竽之慙宜黜而遷以榮為懼臣敢不

深思僥冒勉竭疲庸為山公啟事之書知非所及守崔
亮停年之格何足言勞尚幾典選之平少助官人之道

代謝吏部侍郎表

代言西掖方拜誤恩攝貳東銓復叨改命循牆莫避臨
谷增危中謝伏念獲落無堪迂愚自信正以經營於菽

水故嘗希望於斗升昨自外官恭趨嚴召猥廁內朝之
鴈列親覩上聖之龍飛五歷粉闥一參月寺籌邊戎幕
無婉畫之可稱將命北庭幸歡盟之復締冒柱史詞臣

銓部為真猶未經於滿歲機廷筮貳乃遽辱於頒恩遜
避靡遑周章增惕

中謝

竊以官莫崇於執政職無重於

本兵必求文武之全才以任國家之重事邊隅甫定尚
勤宵旰之憂邦域以寧允藉弼諧之助豈應疲瘁可與
幾微如臣者資實腐儒仕叨法從由久司於封駁故多
積於怨仇十載歸閒仰戴乾坤之施一朝收召復觀日
月之明不堪聽履之華復上垂車之請敢期渥俾贊
洪樞血氣既衰止合奉身而去軍旅未學孰知師命之

嚴玷書殿之清班忝儲局之下客被繡韉於上駟束鐻帶以襲衣米食有加寵榮已甚茲蓋伏遇皇帝陛下人惟求舊政務圖新謂代言於受禪之初未忘孤迹迨趣還於更化之始深憫周年豈云術業之可稱蓋自眷私之過厚遂容僥倖倍切凌兢臣敢不深感隆恩愈堅晚節老當益壯固欲殫報主之忠耄矣無能終恐負知人之鑒臣無任

云云

進三朝國史表

呂伯恭

三后在天軼洪猷於今古百王冠德紀茂實於典謨爰
勒信書上干乙覽臣切以炎宋開萬年之祚裕陵發六
葉之祥丕顯哲宗於皇徽祖淵神心之相授煒聖列之
增光載績武功疊西羌湟鄯之績稱秩元祀踵原廟丘
澤之規紛綸圖謀之符璀璨梯航之貢輯衆髦而建學
嗣養化源憲六典以建官世嚴朝著前揖商王之躅俯
卑唐帝之勲運啓中興統承丕緒南陽基命建武之元
號重開東觀紬書太初之後闕不錄博延新學論次舊

聞大繼照以龍飛甫終篇於麟獲視諸故府配三聖金匱之藏副在有司為千載石渠之鎮於斯為盛莫之與京恭惟皇帝陛下孝通神明誠贊化育有典有則仰思祖武之繩紀動紀言下叶孫謀之燕播諸琬琰炳若丹青臣職總編摩功慙潤色莫測乾坤之蘊第輸鉛槧之勤述義農黃帝之書既垂成式由堯舜文王之道願軫宸衷臣無任瞻望闕庭竦懼屏營之至謹以三朝國史隨表上進以聞

宰臣以下賀車駕幸秘書省表

東觀書林久徯漢儀之觀西崑策府載瞻周馭之臨嗣
三紀之閱暮軼百王之盛節臣等懼忝忝頓首頓首
切以斯文崇替與世降升自我祖宗嚴載籍萃藏之地
于時典冊踵乘興游幸之書從容藏誨之求廣大峻良
之聚災圖再造華省一新爰親御於右文用仰繩於前
武重明善繼太極丕承乙夜牘陳念初載網羅之不易
昕朝班入思中興儲養之有原乃臨三館髦彥之躔乃

展列聖圖書之典帝暉下矚光榮河溫洛之藏天藻昭
垂跨過沛橫汾之詠湛露示醇釀之惠承雲宣純繹之
音一日萬機曾靡齋居之暇九流七畧獨煩清蹕之留
蓋以恢稽古尚德之風天豈為飾治樂成之舉聲明布
濩慶澤汪洋恭惟皇帝陛下秩叙大經裁成王度多聞
將求建事既惠顧於簡編大烹所以養賢復均頒於肴
醑士心興起雅道流行臣等服在具僚身逢昌會第從
臣之頌敢揚厲於鴻休近天子之光請具宣於德意臣

無任

云云

知黃州謝表

具官臣某言臣蒙聖旨命臣解倉部之職出知黃州者
臣惟提邊符而乘障媿非禦侮之才佩郡紱以長民莫
稱承流之寄撫躬跼蹐蒞事凌兢

中謝

竊以羣萬國之

輿圖大一王之統御地分遠邇之別政有後先之差繫
牧守必得夫循良則黔黎庶底乎康乂睠惟小壘介於
長淮雖事簡而俗醇實望輕而責重登覽故迹多名勝

嘯咏之餘參攷前聞亦豪傑馳驅之舊肆求共理必簡
異能如臣者樸拙孤蹤凋殘遺族冥心造化已絕意於
紫青屈首簿書第研精於朱墨偶濫塵於論薦遂誤畀
於蕃宣自揣庸虛若為稱塞茲蓋伏遇皇帝陛下錫天勇智
受命溥將日月光華悉在照臨之下乾坤高厚咸歸覆
幬之中凡茲銅虎之頒尤謹玉關之戍曾何疎賤亦預
選掄臣敢不宣布詔條輯寧閭里挈筭守器誓力保於
封陲毀瓦畫墁敢坐縻於廩祿臣無任

云

謝史成受朝奉郎表

曾子開

裁成二帝之書仰資聖訓褒錄諸儒之效俯逮孤生謬
進官榮併叨恩賚省循非稱冒昧為慙竊以簡策之傳
固多帝王之書為重文章之用非一述作之體為難在
昔有邦若時稽古自周而上具載百篇之言由漢以還
各成一代之史典謨之辭畧而雅春秋之法謹而嚴子
長雖謬於是非見稱事核益堅頗推於詳贍或患文繁
降及後人益艱是任或紀事支離而失實或設辭骯骯

而不工或踈畧抵牾之相形或取舍抑揚之未當歷觀
前載茲謂材難矧兩朝功德之崇高而五世聲明之富
有以至俊傑瑰奇之士禱祝鬼瑣之姦載在信書傳之
後裔宜得貫穿馳騁之學溫純深潤之辭追二典之光
華垂百王之軌範如臣之鄙揣分無堪幼聞道於父兄
粗知好古長論文于師友切慕著書然而植性昏冥受
材濩落有淺見寡聞之累無屬辭比事之長遭世盛明
脫身冗散天祿石渠之典蚤預校讐金匱玉板之文得

參論次茲儒林之盛選實仕路之殊榮特達甄收莫非
帝力周旋長育咸出上恩自視庸虛固難報稱雖勤劬
於夙夜漫淹歷於歲時聞發大猷豈敢希於作者整齊
故事或可繼於前人甫臨汗簡之終適遭負薪之疾奏
書天陛阻親望於清光拜賜宸庭莫與聞於褒詔豈期
推賞并及罔功養拙藏愚久已逃於常憲因人成事茲
復玷於異恩遜辭弗容驚惶失措此蓋伏遇皇帝陛下
務尊先烈祇紹永圖謂祖考之功非形容之可既而子

孫之孝在潤色之為能深詔有司共成大典蓋兼資於衆智不求備於一人每矜載筆之勤靡間吹竽之濫致茲瑣質均被鴻私螻蟻雖微素積愛君之念涓塵有補敢忘許國之忠

陳州謝上表

初緣細故輒丐徙州繼露危誠復求易地圖報未伸於萬一冒煩已至於再三自非仁恕之朝當在譴訶之域聖恩甚厚私願弗違視太守之章孱愚知幸望長安之

日感涕難勝伏念臣託勢至孤叨榮過重謀身寡術易
致於人非竊祿無功難逃於鬼瞰材微命舛禍薄災深
方祗歷下之行忽遘漳濱之疾頽筋骸之素憊困藥石
之交攻氣屬如絲識幾去幹已分身歸於厚夜不圖天
假於餘生恍如夢寐之初回憺若醒醲之未解神明凋
耗形體支離念官守之尚遙迫王程之有限內省尫羸
之質豈堪撼頓之勞非敢自愛於疲瘡實懼仰慙於任
使幸脩門之在望恃延閣之見收叫闡自言伏鑕俟罪

蓋疾痛之加者呼父母而是懇精誠之至者動金石而
非難果上惻於淵衷俾曲從於私便維茲藩輔密邇京
師事簡民淳首被朝廷之化里安戶佚稀聞枹鼓之音
願臣何人獲此善地可觀康寧之福皆緣覆護之恩矧
嘗守於是邦有相望之仲氏流風未遠故事可詢重念
臣昨守汝陰亦隸畿右始引小嫌而求避出於慮患之
太周終明大體而復還良以至公之在上銘心敢怠粉
骨難酬此蓋伏遇皇帝陛下聰明燭於四維而隆寬盡

下威德加於九有而內恕及人篤遺簪墜屨之仁推藏
疾納污之誼太皇太后陛下處奧室之中而周知萬事
據崇高之勢而洞照羣情常懷大德之好生不忍匹夫
之失所憫臣忝陪侍從之末察臣實嬰沈瘵之餘假借
寵靈安全孤朽臣敢不體上之慈而哀矜于下念己之
病而綏養斯民庶收塵露之微少答乾坤之施

賀元祐四年明堂禮成肆赦表

侑帝饗親既金聲而玉振赦過宥罪遂雷動以風行歡

聲達於幅員協氣冲乎上下竊以躬事天之禮莫如王者之堂極嚴父之心是謂聖人之孝講茲鉅典屬在熙朝即路寢以親祠兆于仁祖黜五精之並祭斷自神宗光照前聞啓迪後嗣恭惟皇帝陛下紹膺寶命祇適先猷平成百度而不有其功覆載羣生而不尸其德謂時和歲豐之效乃高穹顧諟而然謂刑清武偃之祥乃七廟威神之致矧屬承祧之始永懷濡露之恩將伸報本之誠且展事生之道以祭恐數而瀆故遵三歲之期以

郊則遠而疏故度九筵之位季秋令月吉日上辛備法
駕之儀協雅聲之奏牲牷博碩籩豆靖嘉元龜大輅之
旅陳篆轂錯衡之輻湊并柯共邸按圖謀而充庭鬢首
貫胸衽衣冠而就列以引以翼有壬有林奠珪幣以告
虔舞羽旄而象德靈心合荅精意感通嘉得四海之歡
增壽萬年之策尚念有司之庶獄豈無弗獲之一夫乃
御端闈亟敷大號滌瑕盪穢已責逮鰥空狴犴而縱縲
囚開府庫以賜軍士布慶施德昭天漏泉彼泣辜弛網

之仁推食解衣之惠方之于此不其狹歟臣忝綴從班
適分州寄莫與奉璋之列徒懷拱極之心

南京謝上表

得郡便私未報期年之政因人易地更分京邑之權朝
始去於故樓夕已臨於新郡伏念臣材不堪於巨用行
有愧於古人蚤塵侍從之華寢冒藩垣之寵未踰再歲
更守二州既不能興教化於民使之遷善而遠罪又不
能作聰明于外因以譁世而取名惟殫夙夜之勤期副

焦勞之念矧彼淮陽之地舊為楚國之郊屬頻年昏墊之餘加比屋凶饑之後浚溝洫以疏積潦發廩庾以賑流民方竭力于經營遽蒙恩而罷徙國家別建都邑內壯皇居維王迹之所基視他邦而尤重掌離宮之筦籥奉原廟之衣冠以屬微臣彌慚非據此蓋伏遇皇帝陛下矜憐舊物優假近班尚容環走于王畿因使周知于土俗奉承清問敢希宣室之歸攀仰末光未覺長安之遠誓當盡瘁少冀分憂至于事鞭朴以立威飾厨傳以

千譽非明時之所尚亦私義之不為

徐州謝上表

懷章去國不啻三年荷橐入朝未淹百日復棲遲於民
社驟違遠於闕庭迫義理之當然豈人情之所願竊念
臣稟性固陋承學迂踈懷泥古之至愚抱守官之獨見
豈特難堪於世用固已不善於身謀昨者召自留都處
之宗伯屬郊丘之肇祀議天地之經祠執禮雖明趨時
則戾已行之令豈孤論之能回不韙之誅敢偷安而苟

免旋抗章而請臯蒙易地以示恩繼露微衷復頒溫詔
終賴乾坤之造曲成犬馬之私假以使符置之善地循
行閭里固多魚稻之饒周覽山川頗有江湖之趣夫何
孤蹇獲此便安此蓋伏遇皇帝陛下寬裕有容包函徧
覆將以招致芻蕘之論是用特寬斧鉞之威伏惟恩慈
豈易報稱臣身雖在外義不忘君况仰賴於皇明忍自
愆於官守深念長人之寄知無不為益堅許國之誠死
而後已

賀冊皇后表

中闡肇建盛禮興行人神協謀夷夏胥慶竊以國家為
天下之本后妃實王化之基致治所繇求端非遠恭惟
皇帝陛下紹天駿命垂世永圖承七廟之吉蠲奉三宮
之供養而長秋虛位六職曠官咨求淑人來相宗事上
遵太母之訓下採有司之言鼓鐘在庭典冊備物坤元
博厚已正於隆名婦順章明可風於率土臣身雖在外
義不忘君誦造舟之詩想見光輝之盛申彤管之戒庶

幾補報之忠

賀上傳國寶表

受命之符為時而出自天之祐維聖是承方拜貺於大
庭遽均恩於率土官師動色海宇蒙休臣聞夫國璽之
有去來猶周鼎之有輕重好治而惡亂舍昏而即明頃
自有唐之衰荐更五代之季伏而不發殆且百年忽爾
自歸將傳萬世所以表祖宗積善之慶告社稷靈長之
休在聖與仁宜昌而壽恭惟皇帝陛下沉潛迪哲剛健

好生參天地以成能垂子孫而作則果有神物是貽皇
家固將配甘露以紀元豈止擬芝房而度曲臣職專守
土志切慕君講稱壽之儀阻陪下列奏升中之頌敬俟
方來



欽定四庫全書

唐宋元名表卷下之一

唐宋元名表卷下之一